

RELATION
D'ANGLETERRE,
PAR MONSIEUR
MARC-ANTHOINE
CORRER.

Ambassadeur Ordinaire pour
la Serenissime Republique
de Venise.

*Fidèlement traduite des Manu-
scrits Italiens.*



A MONTBELIARD,
Chez CLAUDE HYP, Imp.
de Son Altesse Serenissime.
M. DC. LXVIII.

25



RELATION
 D'ANGLETERRE,
 Par Monsieur
 MARC-ANTOINE CORRE,
Ambassadeur Ordinaire :
pour la S. Republique
de Venise.



LESTANT obligé par le
 devoir de mon Am-
 bassade ; Prince Sere-
 nissime ; & Senateurs
 tres-excellens, de vous
 rapporter selon l'an-
 cienne & loüable coustume de cette
 Republique Serenissime, les affaires
 & l'Estat de l'Isle & Royaume d'An-
 gleterre, d'autant plus considerable

dans ce temps, qu'il est nécessaire de vous faire connoître les qualitez d'un Royaume entierement different des autres, tant par sa scituation que par sa nature; & en mesme temps celles de deux Princes, dont l'Estat est considerable par-dessus tous les autres Estats de l'Vnivers pour plusieurs raisons, & principalement pour le peu de connoissance & d'experience qu'ils ont dans l'art de regner: Je sçay que pour satisfaire dignement à ce devoir, & s'en acquitter comme il faut en la presence de tant d'illustres & graves Senateurs, Il seroit nécessaire d'une personne plus iudicieuse, plus experimentée, & plus robuste que la mienne: mais l'obligation de la charge en laquelle ie me trouve étably par le consentement vniversel de ce tres-Auguste Senat, qui a bien voulu m'honorer de cette dignité, est si grande que ie ne puis sans crime & sans perte de mon honneur, manquer à ce devoir, en aucune façon.

Je dis donc que la nécessité jointe à l'extrême bonté de V. S. & de tous ces Seigneurs Illustriſſimes ; est capable d'excuser & mon insuffisance & la foiblesse de mon naturel, debilité depuis peu extrêmement par la descente d'un catharre, qui s'estant engendré, ou par les rudes fatigues du voyage, ou par le changement d'air, me travaille tellement depuis mon retour, que ie n'ay pas esperance d'en pouvoir estre si-tost délivré: C'est ce qui m'a fait résoudre dans cet estat debile, de m'acquitter du devoir de ma charge selon mon petit pouvoir, plustost que d'abuser de la patience d'un si noble & si excellent Senat, m'estant persuadé que dans cette occasion ainsi qu'en tout autre l'intention & la bonne volonté seront sans doute gracieusement receuës, & suppléeront à mes defauts & à mon impuissance. Je tacheray donc de me reſtraindre, & de parler seulement des choses plus necessaires, si vostre Grandeur Serenissime, & vos Excel-

lences n'interrompent point cette Audience, qu'elles m'ont déjà préparée; & je feray mon possible d'éviter la prolixité, tant pour ne pas ennuyer par un long discours cette noble Assemblée, que pour diminuer ma peine & mon incommodité.

Ne trouvant à propos de passer sous silence quelques qualitez generales du Royaume d'Angleterre, dont la description ne sera peut-estre pas inutile, bien que la plupart d'entre elles soient sans doute déjà venues à la connoissance des hommes; Je diray, Prince Serenissime, que cette Isle est scituée dans la Mer Oceane vers la partie Occidentale de l'Europe, au cinquante-vnième degré & demy; opposée du costé de l'Orient à l'Allemagne inferieure, ie veux dire la Flandre; du costé d'Occident à l'Isle d'Irlande; devers le Nord, à la Mer Oceane & aux Isles Orcades; & vers le Midy, aux Havres & aux Villes de Normandie & de Bretagne.

Je ne parleray point des noms di-

vers de cette Isle, non plus que des Peuples qui l'ont possédées en divers temps, parce que ie trouve que cela n'est pas necessaire : Au reste, elle est d'une forme triangulaire, & son circuit, y compris l'Ecosse, est de 1720. milles d'Italie ; elle est pourvue en toutes parts de Ports commodes & d'assez bon nombre de fleuves : mais sur tout son air est tres-temperé, la chaleur & la froidure y estant beaucoup moindres que celles que nous ressentons en ces pays ; Elle ne produit aucuns animaux venimeux, ny mesme n'en nourrit, parce que l'on n'y en porte point : D'où vient que tous les Medecins disent d'un commun accord, que si ces peuples s'abstenoient de la débauche, à laquelle ils sont tout a fait enclins, ils pourroient jouir d'une tres-heureuse & tres-longue vie.

Elle n'est pas entierement plaine ; mais elle est diversifiée par certaines petites collines, qui ne se peuvent presque discerner d'avec les campa-

gues, lors qu'on les regarde de loin.

Elle est fertile, si on a égard aux habitations qui abondent de toutes les choses nécessaires, excepté de celles qui servent plustost aux plaisirs & aux delices, qu'aux necesitez: mais on y en apporte des pays étrangers; auxquels elle fournit en revanche beaucoup plus de celles qui croissent dans ses terres propres. Les choses qu'elle donne en abondance, ainsi que chacun sçait, sont les laines & les draps de toutes sortes, qui sont de si grande importance pour leur qualité & pour leur quantité, qu'on dit pour assuré qu'il s'en transporte tous les ans hors du pays pour plus de six millions d'or. En apres elle abonde en plomb, estaing, heurre, & bien souvent en froment, legumes & autres sortes de grains, lesquels sont ordinairement transportez en Hespagne, & principalement à present que ces deux Nations sont en fort bonne intelligence. Les choses dont elle a besoin sont les Espi-

ceries, Sucres, & toutes sortes de fruits qui viennent de France & d'Espagne, comme vins, huiles, draps de soye & d'or, toiles, bois, saffran, & même le poisson pour la plus grande partie, cōme aussi le pastel & autres couleurs. Ainsi par ces trafics & autres importants commerces qui se font en cette Isle à cause de sa situation, elle est non seulement fréquentée de toutes les Nations du monde, mais aussi les Angloismes-mesme passent avec leurs Navires en tous les lieux, d'où ils croient pouvoir retirer quelques marchandises qui leurs soient utiles & profitables. C'est pourquoy on l'estime la plus belle, la plus commode, la plus riche & la plus délicieuse Isle de tout l'Univers.

Elle est divisée en deux parties qui contiennent deux Royaumes avec le Mont-Chenu; & les fleuves Salvo & Tuedo divisent le Royaume d'Angleterre de celui d'Escoce, les Escoffois étant au Septentrion & les Anglois au midy.

Je pourrois encore faire icy vne sous-division de ces Royaumes en nō-
mant les Villes qui ont Evêchez &
Archevêchez : mais desirant que ma
Relation soit succinte , ainsi que ie
vous l'ay déjà temoigné. Je laisseray
ces discours à part comme peu neces-
saires & déjà inferés en plusieurs Li-
vres , où toutes ces choses se trouvent
suffisamment décrites. Je diray seu-
lement que comme les Provinces sont
differantes de coustumes entre elles,
ainsi elles sont bien souvent dissem-
blables de langue ; parce qu'elles par-
lent diversement & qu'elles ont cinq
ou six sortes de langage ; il suffira
pourtant que ie vous die vne paro-
le de la Ville de Londres , qui est vne
des principales d'Europe , tant pour
son étendue , que pour sa Scituation
& la multitude de ses habitans, que
l'on tient estre iusqu'au nombre de
300 mille ames : Elle est toute rem-
plie de boutiques de Marchans , & de
toutes les choses qui peuvent servir
pour l'usage & la commodité des

hommes: L'on y voyoit autresfois vne infinité d'Edifices & de Temples fort superbes, ce qui nous est vn argument assésuré de la pieté de leurs Ancestres: mais maintenant elles sont entiere-ment ruinées & desertes; en sorte qu'il ne reste plus rien que les murailles, qui seruent plustost pour la promenade, & pour deviser & traiter d'affaires, que pour y adorer la divine Majesté, pour le culte de laquelle elles furent autres-fois bâties.

L'on y voit aussi vne tour assez remarquable pour son antiquité, & non pour sa forteresse, parce qu'elle n'est deffendue d'aucuns boulevards, ny ramparts, ny autres fortifications regulieres qui la puisse rendre assésurée: Neantmoins le Tresor de la Couronne est là dedans, comme aussi certaine quantité d'armes, artilleries & autres preparatifs de guerre: mais elle sert le plus souvent pour garder les prisonniers d'Estat & de consideration.

Le pont basti tout de pierre, est soustenu de 19. arches, & traverse la

Riviere; il est rempli d'une infinité de boutique, qui le rendent extrêmement estroit & luy ostent sa beauté naturelle, le chemin estant si resseré qu'il est bien difficile que deux Carrosses se rencontraient, puissent passer sans embarras.

Le fleuve s'appelle la Tamise; & outre qu'il est extrêmement agreable, il est si commode, qu'il porte une infinité de batteaux de 300. & 400. tonneaux, lesquels arrivent de toutes parts par le moyen du flux & reflux de la mer. Mais surtout cette Ville est riche au dernier point, non seulement pour le grand commerce qu'elle entretient avec toutes les autres nations; mais encore pour les privileges dont jouissent les habitans qui sont tous gens populaires, marchans & artisans: entre lesquels il y en a vingt-cinq nommez *Aldermans*, des plus riches & des plus pecunieux; La Ville est gouvernée absolument par ces Messieurs, & elle est réglée en forme de Republique, sans que le Roy ny

Les Ministres se mêlent en aucune façon du Gouvernement: Et ce que la ville de Londres à coustume de faire, les autres villes du Royaume le font pareillement.

J'ay dit gens populaires, parce que les nobles suivans la coustume de France & d'Allemagne, vivent presque toujours en leur terres & à la campagne, éloignez de la ville. Tout le monde estime que la Richesse des Bourgeois de cette ville est supprenante, & qu'elle provient toute de la marchandise, & du trafic qu'ils entretiennent avec les quatre parties de l'Univers, ces gens ayans coustume d'exercer la marchandise par le moyen des Compagnies qu'ils establisent: mais à present il n'y en a que 2. dont l'une est celle de Moscovie & des Provinces adjacentes, comme Pologne, Suede, Russie, &c. L'autre est celle du Levant, dans laquelle ils comprennent toute l'Italie.

Les Interressez de cette derniere, ont souvent esté en pensée de la rompre

sur la croyance qu'elle ne leur estoit à present d'aucun profit. C'est pourquoy quelques-uns d'entre eux m'ont souvant sollicité de sçavoir de vostre Serenité, si elle seroit en disposition, de leur permettre de pouvoir tirer de Venize, les Marchandises qui viennent du Levant, sans payer les droits de sortie, m'assurant que si une fois V. S. avoit trouvé bon de leur accorder cette franchise, ils abandonneroient entièrement la navigation du Levant; ce que j'ay écrit aussi-tost & plus d'une fois à cet Auguste Senat, estimant que c'est le veritable remede & l'unique moyen de nettoyer ces Mers des Anglois, qui ont tant fait de dommage à vos vaisseaux & à vos sujets, qui trafiquent dans le Levant; estant certain & bien informé, que plusieurs navires partent d'Angleterre sous pre-texte de marchandise avec quelques charge pour le Levant, qui pourtant n'ont point d'autre dessein que de pirater & faire l'office de corsaires quand l'occasion s'en presente; Et lors

qu'ils ont fait quelque prise ou butin, ils se resoudent d'estre banys & absens de leurs pays pour quelques temps, dans l'assurance qu'ils ont de pouvoir en peu de temps y retourner & jouir du fruit de leurs prises, en faisant quelque present, qui est l'unique remede en ce pays pour surmonter toutes sortes de difficultez & venir à bout de tout.

Ayant égard aux interets de V. S. je sçavois fort bien qu'elle avoit autrefois donné vn ordre très-particulier aux Bailes de Constantinople: d'employer tout leur credit, & tascher mesme par toute sorte de presens considerables a ruiner & empescher le commerce des Anglois dans les Pays du Turc, d'où l'on jugeoit alors, & on cōnoist à present le grand prejudice que nostre ville & nostre nation, qui trafique en ces pays en reçoit, tant par la concurrence du prix des marchandises, que par celles qui nous demeurent, à cause du transport qu'en font les Anglois, comme les carisces

l'estaing, le plomb & autres marchandises qui se conduisoient premièrement en cette ville, & delà estoient transportées par nous autres dans le Levant : mais n'ayant jamais eu réponse sur cette proposition, j'ay abandonné cette affaire. Pour vous faire donc entendre quelles sont ces Compagnies & comme elles se gouvernent, je parleray de la Compagnie du Levant, & ce que je diray de celle-cy se doit pareillement entendre de l'autre. Cette Compagnie est vne Société d'hommes choisis qui trafiquent dans le Levant, & il n'est permis à aucune personne, qu'à ceux qui y sont inscrits de faire negoce & marchandise dans les Pays du Turc : elle elit d'elle mesme ses Officiers & Commandans, & elle est obligée d'entretenir à ses propres frais & dépens, un Ambassadeur à Constantinople; d'avoir des Consuls par tout cet Empire; de subvenir au besoin des dons & Présens, & enfin de faire toutes les autres dépenses nécessaires; sans qu'il en cou-

ste vn double à la Couronne. Le Roy n'y a rien à voir sinon qu'il leur donne des Lettres de Protection sous son nom ; Car au reste elle se gouverne d'elle mesme , ainsi que font toutes les autres Compagnies. D'ou vient que plusieurs se sont faits riches par ce moyen, de 150. mille & de 200. mille écus, y en ayant mesme entre-eux qui se sont enrichis de 4. & 5. cens mille écus. Mais nous laisserons ces particularitez comme conuës à tout le monde & peu necessaires, afin de venir à ce qui importe le plus, & dont la connoissance est de la derniere consequence pour cet Auguste Senat. Je traiteray donc en premier lieu des forces de cet Estat.

FORCES DU ROY D'ANGLETERRE.

QUOY que la puissance de cet Estat ayt esté autrefois divisée, & que l'Escoffe ne soit vnüe à l'Angleterre que de nostre temps, & en la per-

sonne du Roy presentement regnant: si est ce neantmoins que l'antipatie & la mes-intelligence des Anglois & des Escossois font juger que cette Vnion à plustost diminué, qu'augmenté les forces de ce Royaume: veu que la haine, qui est entre ces deux Nations est si grande, qu'ils entreprennent sur la vie les vns des autres, & cherchent par des manieres tout extravagantes de s'entre procurer la mort. Cela fait qu'une infinité d'Escossois & des principaux, pensent à faire retraite dans leurs propres maisons pour conserver leurs vies, & n'estoit que le Roy par vne force majeure, s'il faut ainsi parler, les contraint à rester, il est certain que tous vniverselement auroient abandonné le pays. Mais pour laisser maintenant cette matiere à part, je vous diray que la Couronne d'Angleterre ayant possédé l'espace de plus 300. ans la Normandie, la Bretagne, la Guyenne & la Gascongne, Provinces principales de France; & mesme le Roy Hen-

ry VI. ayant esté Coronné publiquement à Paris l'an 1348. elle se trouve neantmoins à present privée de toutes ces Provinces, & n'en retenant que le Titre, possède seulement toute l'Isle d'Angleterre; laquelle, comme nous avons déjà dit, comprend les Isles Eboïdes & Orcades au nombre de 70. ou environ avec le Royaume d'Irlande. Ce n'est pas pourtant que nonobstant la perte de tant de nobles & importans membres, elle ne se trouve en bon estat, & capable de se défendre contre les insultes de ses ennemis sans l'assistance d'aucun Prince; Et l'on peut dire avec verité que non seulement il est difficile, mais du tout impossible de la conquérir, pourveu qu'elle soit sans dissensions & sans guerres intestines, comme je feray voir cy-apres.

Afin donc de parler des forces maritimes que nous devons particulièrement examiner, à raison que ce Royaume est insulaire; elles sont aussi beaucoup diminuées & decheuës de

leur ancien estat; Et pour ne confiderer pas les choses trop éloignées de nostre siecle, & du temps que les Roys de ce Pays mettoient en mer plus de mille vaisseaux contre leurs ennemis, comme fut la fameuse armée navale avec laquelle Henry V. attaqua Charles VI. Roy de France; mais à parler seulement des regnes des Roys Henry VII. & VIII. ils avoient tousiours plus de cent navires bien en ordre & bien équipés, & les Officiers tres-bien payez, lesquelles pouvoient sortir à l'improviste en campagne: mais maintenant il ne s'en trouve pas plus de 37. dont plusieurs sont vieilles, ruinées & reduites à vn point de ne pouvoir pas rendre grand service.

Je ne puis dire si cela procede, ou de negligence ou de la crainte de faire de la despence: mais ce peu qui reste avec celles des sujets particuliers, dont le Roy se peut servir dans les occasions, ainsi qu'il pourroit faire des vaisseaux estrangers en cas de besoin, sont non seulement capables de res-

ster & de se deffendre contre tous leurs ennemis, mais aussi seroient bastantes d'entreprendre & d'attaquer: parce que il s'en trouve en plusieurs lieux qui appartiennent aux particuliers de Royaume plus de 200. tant grandes que petites, propres à mettre en mer, & à servir contre les ennemis, sans conter celles des Estrangers: au reste il n'auroit pas beaucoup de peine à les armer, puisque ce Royaume est autant & plus que quelque autre Estat que ce soit, muni d'Artillerie, de poudres, & d'armes: & ce qui est encore plus considerable, cette isle porte vne infinité de matelots, & d'hommes propres à la marine. Il est bien vray, pour tout dire, que si cette Couronne est long-temps en paix, quelle ne se determine pas à tenir vne plus grande quantité de vaisseaux armez pour l'entretien des gens de mer, & qu'elle n'empesche pas ses sujets de vendre leurs vaisseaux & leurs artilleries, comme ils ont commencé à faire publiquement & souvant, sans doute

qu'ils seront bien-tost reduits en pire estat, puisque le Roy presentement regnant, ne tient que trois vaisseaux armez contre l'ancienne coustume de ce Royaume: Parce que cette Couronne estant en paix avec tout le monde, les particuliers n'ont pas occasion d'equiper les leur, principalement à cause des expresse deffences qui leur ont esté faites d'aller en course: & de plus le trafic des Indes estant suspect, & les particuliers ne sçachant à quoy employer leurs navires, ils se determinent de les vendre; & les marins s'employent à d'autres exercices pour gagner leur vies. Cecy est suffisant pour ce qui concerne la marine.

Quant aux forces de terre, l'infanterie seroit innombrable, si l'on consideroit toutes les personnes qui seroient propres à porter les armes pour la deffence du Royaume; puisque dans le seul Conté de Sorer d'entre 39. en lesquels ce Royaume est divisé, sans

y cōprendre l'Ecosse, il se trouve plus de 70000. hōmes inscrits, dont la plupart seroit indubitablement propre à manier les armes, & par ainsi le nōbre seroit infini: il est bien vray, quē par le peu ou le point du tout de soin que l'on a de les exercer, on n'en pourroit esperer aucun service dans les occasions, & que dans vne attaque impreveuë, ils apporteroient plustost de la confusion & du trouble, que du service & de l'vtilité; comme on vit manifestement, l'an 1588. lors que l'Armée du Roy d'Espagne se jetta en ce Canal à dessein d'entreprendre sur ce Royaume, lequel au bruit de cet advis se mit dans vne si grand desordre, que tous ne sçavoient de quel costé se tourner, estant dans une si estrange consternation, que quoy que la Reyne envoyât incōtinant ses principaux Ministres, pour rallier toutes ses gens & deffendre les costes, il leur fut impossible d'en venir à bout, en sorte que la Reyne fut obligée de monter elle mesme à cheval, & se mettre en

Campagne, faisant la charge de Capitaine, donnant ses ordres par tout, promettant aux gens d'obéissance, & chastiant ceux qui refusoient de prendre les armes pour la deffence du Royaume. Si bien qu'elle reconnut par là, combien elle estoit mal servie par ses Ministres, n'ayant peu qu'avec grand peine metre 20. mille fantassins ensemble, la moitié sans armes, bien qu'elle y fut en personne: C'est pourquoy la nouvelle estant venue, que la tempeste avoit chassé l'armée Espagnole, dans les parties les plus Septentrionnelles de cette Isle & l'avoit entierement fracassée & mise en déroute; Elle rendit graces au Seigneur de sa paternelle protection & du soin qu'il avoit eu de conserver son Royaume & sa personne; cōfessant que si l'armée descendoit une fois en l'Isle, comme les Espagnols avoient projeté, la Couronne d'Angleterre courroit grande risque, & auroit esté dans un eminent peril d'estre perdue: ce qui luy ayant servy d'avertissement, elle

mit ordre que l'on fit faire l'exercice à ses gens, & que l'on les armaſt de la bonne façon: En eſſet, on trouva des armes qui leur furent diſtribuéés, & les ordres ſus-alléguées furent exécutées pour quelque temps: mais maintenant ils ſont en pire eſtat que jamais, quoy que pour l'addreſſe naturelle & l'inclination qu'ils ont généralement aux armes, on les y pourroit facilement perfectionner, n'y ayant point de nation, comme vn chacun le ſçait, qui faſſe moins de conſe de la vie, & qui mépriſe plus le danger que le peuple Anglois. Ie ne veux pas oublier de vous faire remarquer qu'entre les armes offenſives, ils ſe ſervent principalement de l'arc & des dards, dont ils en ont ſi grande quantité que tous s'y exercent généralement, ſans exception de perſonne ny diſtinction d'age, de profeſſion & dignité; en ſorte que le nombre en eſt incroyable: ce qui procede non ſeulement de leur voſonté, mais encore de l'obligation qu'ils ont par ordre du parlement de

tenir vne grand quantité de ces armes dans leurs maisons, mesmes pour les petits enfans, afin de les accoustumer de bonne heure à cet exercice ; les Anglois fondans en cela seul toutes leurs esperances. Il semble neantmoins que depuis quelque temps en ça, cet exercice va en declin, ainsi que toutes les autres choses.

Pour ce qui est de la Cavalerie qui n'est pas moins necessaire pour la defensive que pour l'offensive, (j'entens la legere) si elle estoit bonne, elle seroit nombreuse, par ce qu'il se trouve vne infinité de chevaux en ce pays; mais ils sont foibles & de peu de fatigue, & n'estant nourris que d'herbe seule, ils ne sont pas capables de faire grand proüesse, ny dignes qu'on en fasse conte. Quant à la Gendarmerie cette Isle ne portant pas beaucoup de chevaux propres, excepté la Province de Cornoüaille, & quelques Haras appartenant à la Couronne, elle n'est pas considerable en ce Royaume: Ajoustant à cela, que

que S. M. B. & tous les grands Seigneurs de la Cour ne font estime que des guilledins, à cause de leur bon pas & de leur extreme vitesse, s'en servant fort ordinairement pour le diuertissement de leurs chasses. D'où vient que les cheuaux de vie & de durée qui se rencontrent en ce pays viennent des lieux estrangers; veu mesme qu'ils sont obligés par vne loy assez ancienne, quoy que maintenant très-mal obseruée, d'en tenir ordinairement quelques-vns pour le seruice du Roy & de l'Estat.

Je trouue à propos de vous faire voir en ce lieu comme ce Royaume est extremement fort de soy-mesme, la nature l'ayant placé dans vne Isle enuironnée d'une mer toute differente des autres : Car on n'a jamais encore remarqué en autre lieu qu'en cette coste, & en celle qui est opposée à la Bretagne, vn semblable courant, dont la marée dans son flux & reflux croist & décroist pour l'ordinaire de 12. à 15. pas de hauteur

C'est ce qui a fait que cette Ile estant d'elle mesme vne tres-grande & admirable forteresse, les Roys ne se font jamais mis en peine d'en faire construire aucunes particulieres, & ont pensé qu'elles seroyent non seulement inutiles, mais tout à fait dangereuses; les anciennes guerres civiles leur ayant souuent fait connoistre par experience, que les places fortes auoyent tousiours donné du cœur & de la hardiesse aux seditieux & aux ennemis du repos public, & que d'autre costé les Roys pouuoient bien estre maistres absolus dans tout leur Royaume sans ces forteresses : D'où vient qu'ils les ont estimées fort dangereuses dans les guerres intestines, & dans les externes entierement inutiles & superflus, s'estant tousiours persuadez que la scituation auantageuse de leur pays, leurs forces maritimes, & la multitude de leur peuple estoient d'assez suffisants rempars pour repousser leurs ennemis, &

que quand même l'ennemy seroit prest à faire descente pour les assaillir, ils se trouueroient tousiours bastans & en estat de deffendre leur pays. Par cette raison on ne remarque dans ce Royaume aucune place de consequence que Warvik, laquelle se trouuant scituée sur la frontiere d'Ecosse, estoit autres-fois fort regulierement gardée par les Anglois, dans le doute qu'ils auoient que les Ecossois, alors leurs plus redoutables ennemis, ne les attaquaissent de ce costé-là: Mais maintenant que ces deux Monarchies sont réunies & gouvernées par vn même Prince, cette forteresse est entierement negligée & à l'abandon: Il est bien vray que pour la deffence des Haures, on a fait quelques fortifications en plusieurs endroits maritimes, mais en petit nombre & de fort peu de consideration; Car toute leur confiance est plustost dans leurs forces maritimes, & dans leur bon ordre en cas d'allarme, que dans

guerres contre l'Irlande & l'Espagne, que l'on a juste raison de s'étonner qu'elle n'aye pas plustost fait quantité de debtes, que laissé de l'argent après sa mort. Et de plus le Roy son successeur, fut non seulement contraint dans son eue-
nement à la Couronne de faire des frais immenses, mais encore de departir des dons & des presens si précieux & si riches, qu'ils surpassoient la magnificence de son naturel quoy qu'extremement liberal: Car il ne pouuoit pas differer, pour ainsi dire, à recompenser mille personnes, qui l'auoient fort long-temps seruy dans le Royaume d'Ecosse, dont la pauureté ne luy auoit jamais permis de leur faire la moindre reconnoissance. C'est par cette raison qu'aussi-tost qu'il se vit maître d'un Royaume riche & opulent comme l'Angleterre, il se mit en disposition de donner des marques de sa generosité à ceux qui l'auoient seruy, & voulut pour recognoissan-

ce faire present à ses seruiteurs, la plus grande partie Ecollois, de plus de deux millions d'or en argent, joyaux & possessions: Il faut neantmoins remarquer que nonobstant ces depences surprenantes, si la Couronne se trouue engagée de debtes, elles ne sont pas considerables. Et ce Prince se trouue encore autant & plus riche qu'aucun autre Monarque, en joyaux, bijoux, orfeureries, haras, cheuaux & infinis autres meubles precieux, dont la valeur est estimée plus de trois millions d'or.

Je passeray maintenant à la relation des reuenus du Roy, qui sont de deux natures: La premiere est celle que Sa Majesté tire des immeubles, sçauoir des terres dependantes de la Couronne, qui se monte à la somme de 150000. liures sterlin, faisant enuiron 500000. escus d'or. Je vous diray icy en passant que si le Roy vouloit affermer ces terres pour ce qu'il en pourroit bien auoir raisonnablement, il n'y a point de

doute qu'il en tireroit trois fois davantage , puis que depuis 300. ans en ça , la Couronne n'a jamais augmenté d'un sol le prix de ses amodiations anciennes , & néanmoins les fruits de la terre , comme tout le monde sçait , coustent plus de quatre & cinq fois davantage qu'en ce temps-la : Mais bien que la Couronne n'aye pas augmenté ses reuenus , comme ie vous le viens de faire voir , on peut neantmoins dire que Sa Majesté les fait autant bien valoir qu'il se peut faire , puis que quand elle veut gratifier quelqu'un elle luy afferme de ces possessions au prix ancien , & luy les souffermant à d'autres , il en tire trois & quatre fois plus qu'il n'en paye à la Couronne. De sorte que sans mettre la main à la bourse , le Roy a moyen de recompenser magnifiquement les personnes qui le seruent.

L'autre nature de reuenus , sont plusieurs gabelles & imposts qu'on leue dans le Royaume , & que l'on

estime monter à la somme de 700. mille. écus ou environ ; la coustume du pays obligeant à payer l'entréa & la sortie de toutes choses, les vnes plus, les autres moins selon leur qualité : Mais les marchandises estant entrées dans le Royaume, quand mesme elles seroyent transportées dans toutes les places d'iceluy, elles ne payent jamais plus. Il y a de plus les reuenus du Royaume d'Escolle qui peuuent bien faire environ la somme de 100000. écus ; & ceux d'Irlande qui en rendent 28000. & neantmoins ces reuenus & plusieurs autres sont tous depencez dans le Royaume.

Entre tous ces impôts & daces, il y en a vne que l'on nomme la gabelle des Pupilles, laquelle a pris son origine & commencement de Guillaume le Normand, surnommé le Conquerant ; lequel ayant conquis le Royaume d'Angleterre par son courage & sa valeur, s'en rendit non seulement maistre ; mais en-

core s'empara de toutes les terres, & mesme des personnes particulieres, qui s'estoient mis en deuoir de luy resister, & de s'opposer à son entreprise: lesquelles il donna en apres à plusieurs Seigneurs de Normandie qui l'auoient accompagné dans cette expedition, & à quelques autres qui l'auoient bien receu dans le Royaume; à condition toutes-foiſ, qu'ils en pourroient jouyr librement pendant leur vie, & qu'apres leur mort ils en pourroient disposer en faneur de qui il leur plairoit: mais que s'il aduenoit que leurs heritiers fuſſent en minorité, ce qui s'entend depuis le bas âge jusqu'à vingt & vn an, les reuenus qui en prou endroient jusqu'à ce que le Puppille euſt atteint l'âge de majorité au 21. an, ſeroient appliquez à la Couronne, & c'eſt pour ce ſuyet qu'elle eſt appellée la gabelle des Pupilles: laquelle eſtant touſiours affermée, rend jusqu'à 80000. écus. Mais les choses paſſées eſtant tota-

bées dans vn très-grand desordre, donnent matiere aux sujets de ce Royaume de se plaindre extremement, & de pousser des crys jusqu'au Ciel, & mesme ils trauaillent autant qu'ils peuuent à se deffaire de ces sortes de possessions, qui leur semblent apporter, comme veritablement elles apportent, la peste & la ruine dans leur maison. Parceque ceux qui ont eu ces gabelles pour quelque temps, estans des plus grands Seigneurs du Royaume, & pousés d'une passion desordonnée de s'enrichir de plus en plus, ont enfin par leur auarice insatiable, peu à peu introduit cette maudite maxime, que lors qu'une personne possede deux seuls champs de cette sujection, & cent d'une autre nature & francs, ces deux obligent injustement les cent autres à la mesme sujection & gabelle: d'où vient qu'il y a bien peu de personnes dont tous les heritages ne soient chargez de cet insupportable joug. Lequel se

fait d'autant plus grand, que si vn pere venant à mourir laissoit vn Pupil avec des debtes, ainsi qu'il arriue bien souuent, les debtes demeurent sans estre payées, & tous les reuenus vont aux coffres de la Couronne, ou restent entre les mains des fermiers de cette gabelle; & ainsi l'enfant ayant atteint l'âge de majorité, trouue les debtes de son pere, qui auroient esté plus que payées des reuenus dont la Couronne jouit.

A cela on adjouste vne autre condition bien plus mauuaise, qui est qu'incontinent apres la mort du pere, plusieurs courent aux partisans de ces gabelles, & leur demandent la tutelle de ces mineurs, leur promettant certaine somme: Et si ces tuteurs ne sont point parens, comme il arriue bien souuent, ils gaspent & ruinent de fond en comble les biens de ces pauvres pupiles. Et s'ils sont riches & de bonne condition, leurs tuteurs ayans la dispo-

sition de les marier, il leur font offre de quelque fille; que si le pupille vient à refuser la fille qui luy est offerte pour femme, pour n'estre pas de sang & de condition esgale à luy, il est obligé de luy donner autant qu'elle a de dotte.

Le Parlement a tasché bien souvent d'abolir cette sujétion intolérable, & particulièrement le dernier qui y fit son possible; les sujets de ce Royaume ayant offert à Sa Majesté de luy payer, pour 80. mille écus qu'il en tire, la somme de 120. mille; & de plus vn present de 400. mille vne fois payé: Mais le Comte de Salisbury, grand Thresorier d'Angleterre, qui est constitué dans la plus haute dignité de ce Royaume; étant comme ils appellent, le Maître des pupilles d'iceluy, dont il venient vn tres-grand profit, empecha que cette offre ne fust receüe. En sorte que les reuenus ordinaires de la Couronne ne font que d'un million & 300. mille

écus ou environ : Et ne jugeant pas à propos d'en faire icy vn denombrement particulier, ie passe aux extraordinaires, lesquels consistent dans les subfides & leuées, qui sont plus ou moins hautes, suivant les impositions que l'on fait : mais pour parler selon l'usage ordinaire, & selon que la Reyne deffunte en a desia vsé, elles rendoient environ 600. mille écus par An. Et le Roy ne peut faire leuer les subfides, sans le bon plaisir & consentement du Parlement. Cecy est suffisant pour la connoissance des thresors & reuenus ordinaires & extraordinaires de la Couronne.

DES DEPENCES.

LEs depences ordinaires de la Couronne se montent à vn million d'or à peu prez.

Premierement pour le viure seul de la maison Royale, il est depensé tous les Ans l'vn portant l'autre

cinq cens mille écus, somme tres considerable ; nonobstant que la Cour oblige par vn priuilege fort ancien, toutes les Prouinces & les villages du Royaume, de luy donner à vil prix les viandes de quelle qualité qu'elles soient, tant grosses que delicates, les oyseaux, les beurres, bois, charbons, & mesmes des chariots pour transporter de lieu à autre, d'autant que cette Cour n'est jamais stable mais tousiours ambulante, en sorte que pour ce qui vaut dix sols, il ne leur en est pas payé deux, ce qui est vne surcharge aux sujets tres dure & tres importante; Et encore si les Ministres se contentoient de prendre ce qui est necessaire pour la Cour & vn peu plus, cela seroit supportable en quelque façon : mais le mal est, que si la Gour auoit besoin, pour ainsi dire, de 20. paires de chapons, les Ministres en prennent cent, le surplus desquels ils vendent par apres au prix courant; & par ce

moyen ils en tirent vn tres grand profit; d'où vient que l'on voit ces Officiers & ces Ministres deuenir tous riches en fort peu de temps: Et ce que ie dis icy particulierement des chappons, il le faut encore entendre de toutes les autres sortes de denrées.

Le Parlement ayant eu dessein de remedier à cet inconuenient, fit offre au Roy de luy donner sans payement ny argent vne certaine quantité de viures, selon qu'il seroit estimé raisonnable; & mesme quelque chose de plus, afin de se deliurer de la tyrannie de ces Ministres: mais les interessez eurent tant de credit enuers Sa Majesté, qu'elle refusa cet offre, au grand detrimement de ses sujets.

Le Roy employe tous les ans 40. mille écus, pour le payement de cinquante Gentils-Hommes, appelez pensionnaires, qui l'accompagnent dans les solemnitez, & qui marchent avec certains coutelas.

Les gages ordinaires de la maison luy reuiennent à cent mille écus; & la Solde qui se paye aux garnisons entretenues dans les forteresses des Hautes, avec le payement de leurs Officiers, coustent 60. mille écus.

La garde ordinaire du Palais de Sa Majesté est de 300. Archers, dont vne partie accompagnent la personne en tout lieu, & sont tousiours cent à la fois; la paye de ces gens avec celle de leurs Officiers est de quinze mille écus.

Les trois nauires qu'on tient tousiours armées, avec le salaire des gens qui en ont soin, & qui sont comme l'on peut dire dans l'Arsenal, luy depensent enuiron cent mille écus.

Les escuries & les frais de la vènerie & de ses Officiers se montent à 60. mille écus; Et il se fait encore vne depense de plus de cent mille autres par les menus en plusieurs petites choses de diuerses natures. Ainsi Sa Majesté ne depensant pas

plus d'un milion, elle pourroit sans
comprendre les subſides, auoir tous
les ans 300. milles écus de bon : mais
ce ſurcroiſt, & meſme toutes les ſub-
ſides luy ſont derobeés, & mal me-
nagés par les Miniſtres : outre que
ce Monarque eſtant d'un naturel
très liberal, donne fort volontiers
à ſes fauoris.

Je n'ay pas compris dans la ſom-
me des reuenus, les conſiſcations,
qui ſe montent à vne ſomme fort
conſiderable, puis que plus il enti-
re, plus il en depence ; & à peine
ſçait-on que l'on doit faire quelque
conſiſcation, qu'auffi-toſt il ſe trou-
ue vne quinzaine de ſupplians ; &
le Roy eſt très facile à les octroyer.

LA FORME DV GOV- VERNEMENT.

Comme nous auons juſques à
preſent raisonné des Eſtats que
poſſede le Roy, de ſes forces de Mer
& de Terre, de ſes threſors & de ſes

richesses, de ses reuenus & de sa dépence ; Il faut maintenant que ie die quelque chose de la forme de ce Gouuernement ; affin que l'on vienne à connoître les changemens des Royaumes & des Prouinces qui sont gouuernez par les loix municipales, & non pas par les ciuiles & Imperiales, dont se sert cette Republique Serenissime : par ce que ces loix ayant esté establies par Guillaume surnommé le Conquerant, qui vaut autant à dire que Tyran, comme ceux qui enuahissent la Monarchie & montent sur le Throsne par force, ce n'est pas merueille qu'elles soient toutes entierement à l'auantage du Roy, & au desauantage des sujets : & il ne faut pas douter qu'elles ne soient pleines d'intrigues, de contrarietez & de doutes ; en sorte que si le temps me le permettoit, ie vous pourrois rapporter quelques varietez & quelques broüilleries fort notables dans les affaires de Iustice : Mais affin de ne vous pas ennuyer, j'obmettray

cés particularitez, & vous diray seulement que toutes les matieres de Iustices tant ciuiles que crimineles, sont gouuernées, decises & determinées par des Officiers & Ministres propres & particuliers: Mais ce qui concerne le Gouuernement de l'Estat, & la matiere publique, depend absolument de la volonté & disposition du Roy comme Maistre & Seigneur absolu, ainsi qu'il est maintenant, & que ses predecesseurs ont esté.

Il est bien vray que les Roys, soit pour leur commodité, soit pour vne plus grande Majesté, ou pour quelque autre consideration particuliere, dont ie laisse la connoissance à des esprits plus penetrans, ont introduit vn certain Conseil, composé des plus grands du Royaume, & des plus confidens de Sa Majesté; lesquels accompagnent & seruent continuellement la personne du Roy, ayans pour cette raison leur table & leur appartement à la Cour, où ils

sont seruis avec magnificence & respect: Car le Roy se decharge sur eux des trauaux, des fatigues & des incommoditez de tout le Gouuernement; puis que outre la puissance qu'ils ont sur tous les sujets de l'Estat, leur charge porte encore, d'agir avec les Ministres publics & les Ambassadeurs des Princes: Ainsi l'on peut dire avec raison que ces Seigneurs sont l'oreille, la voix & la personne mesme du Roy. Dans ce Conseil on y admet ordinairement trois ou quatre des principaux Officiers de la Couronne, comme le Thresorier, le Chancelier & l'Admiral; outre plusieurs des plus considerables Officiers de la Cour & de la maison du Roy, qui sont tous pour l'ordinaire, des plus nobles & des plus qualifiez de l'Estat.

Ce Conseil n'est estably, ny par obligation ny par loy, mais il depend entierement de la volonte de Sa Majesté; laquelle presuppose qu'il ne seroit pas bien seant de conferer des

Charges de si grand pouvoir & authorité, qu'à des personnes fort considerables, & sur tout en qui elle puisse auoir de la confiance; outre cela le nombre de ceux qui composent le Conseil n'est point determiné, & le Roy, sans auoir égard ny à la condition, ny à l'estat, y admet bien souuent Nobles, Roturiers, Ecclesiastiques, Seculiers & enfin indifferemment ceux qui luy plaisent dauantage; & mesme ils y sont en plus grand credit; se rencontrant dans cette Cour, comme dans toutes les autres, que les gens de peu de merite & de valeur, sont esleuez en plus haute dignité que les personnes braues, genereuses, & dignes de recompenses; parce que cela depend seulement de la faueur & de la volonté de Sa Majesté: Au moyen de quoy le Royaume, & toutes les choses qui s'y font, sont regies par ces Conseillers, selon le bon plaisir du Roy. Mais neantmoins, parce qu'il arriue quelques fois des affaires publiques, lesquelles

les concernent également le bien & le defavantage du Roy & de ses fujets; comme d'establiir nouvelle gabelle, & faire leuée de deniers pour quelque neceffité publique : en ce cas & autres femblables, les Roys fuivent ordinairement par modestie, l'ancienne coutume, qui est de conuoquer le Parlement, & d'assembler les trois Eftats & ordre du Royaume, à fçauoir le Clergé, la Nobleffe, c'est à dire les Comptes, Marquis, Barons & autres Seigneurs de qualité; & les Gentils-Hommès priuez : Affin que les matieres dont il est question, eſtant examinées & déterminées par ceux-cy, elles ſoient en après ou confirmées, ou refutées par eux meſmes.

Et il n'y a point de doute que ce n'eſt pas à preſent comme au commencement que les Parlemens furent créez, & pluſieurs années encore par après; auquel temps la liberté & l'autorité de ceux qui y interuenoient, eſtoient fort grandes; puis

que le plus petit comme le plus grand pouuoit alors sans aucune crainte ny danger, dire franchement ses sentimens, sur tout ce qui concernoit le bien public & le seruice de la Patrie, quand bien mesme il eust parlé contre la personne du Roy, lequel à dire le vray, estoit plutôt chef de Republique, que Monarque: Mais maintenant que ces Princes se sont rendus absolus, les affaires vont bien d'un autre biais. Ce fut Odoard III. qui regnoit en l'an 1329. lequel commença à vsurper cette autorité absolue, que ses successeurs en après ont tousiours depuis retenüe: En sorte que la puissance des Parlemens est beaucoup diminuée, & pour dire le vray il leur reste plutôt le nom & la renommée ancienne, que la liberté & l'hauthorité qu'ils auoient autresfois: puis qu'à present ils ne peuuent rien de valide & d'approuué, s'il n'est confirmé de la volonté & du consentement Roy: Et ces Parlemens sont reduits à vn tel point, qu'ils ne peu-

uent non seulement faire ny loys ny ordonnances, mais mesme il ne leur est pas permis de s'assembler sans le consentement de Sa Majesté; & qui plus est, les Roys ont coutume d'en exclure ceux qu'il leur plaist, & de mettre en leur place des gens en qui ils se confient, & de la volonté desquels ils sont asseurez; estans paruenus maintenant à vne puissance si formidable, qu'ils peuvent tout ce qu'ils veulent; & il n'y a personne ny du Parlement n'y autre, qui ose s'opposer à leur volonté, non pas mesme en faire le moindre semblant, sans encourir vn danger euident de leur personne, & vne ruine infaillible. Il est vray que le Roy à present regnant, ayant succedé à la Couronne avec autant de douceur, de felicité & de tranquillité qu'on scauroit s'imaginer, voulut donner d'abord toutes les marques de reconnoissance & d'affection, à des sujets qui l'auoient proclamé Roy avec tant d'applaudissement, & receudans le Royaume

avec

avec tant d'acclamations & de réjouissances publiques, declara tout aussi-tost qu'il fut entré en Angleterre, qu'estant obligé de conuoquer vn Parlement à son euenement à la Couronne, selon l'ancienne coûtume, & pour diuerses autres considerations, il vouloit laisser à ses Sujets la liberté absoluë d'élire les personnes qui le deuoient composer, se persuadant que par la concession d'vn si grand Priuilege & d'vne si grande faueur, il attireroit tellement le cœur de ses peuples, qu'ils correspondroient d'autant plus à son affection, & auroient tant de respect & de veneration pour Sa Majesté, qu'infailiblement ils luy accorderoient toutes ses demandes, & consentiroient sans aucun delây à tous ses desirs. Mais il ne fut pas long-temps sans s'en repentir, & sans recognoistre que la maxime de ses Deuanciers estoit la meilleure & la plus seure; ce qui l'a bien souvent contraint d'auoier qu'il auoit très-mal fait, de ne pas suiure le che-

min que ses Ancestres luy auoient marqué. De là l'on a veu naistre la difficulté qui s'est trouuée dans l'union des Royaumes d'Ecosse & d'Angleterre, & dont on n'a peu encore venir à bout : De là est venu le refus des leuées & des subsides, & quoy que depuis peu on luy aye enfin accordé, il est pourtant certain, que le but du Parlement en ce rencontre n'a pas tant esté de satisfaire au desir du Roy, qu'à l'interest que plusieurs de leur Compagnie y auoient, preuoyant bien que sans subsides S. M. ne pouuoit restituer l'argent qu'il auoit emprunté de diuerses personnes, par voye de Police : C'est pourquoy il n'y a eu que le seul interest du Parlement qui l'aye obligé de condescendre à vne demande, qu'il sans cela auroit eu indubitablement vn mauuais succez. Je pourrois vous depeindre en ce lieu les ceremonies & la pompe ancienne, avec laquelle le Roy & les Barons prennent seance en ce parlement, & vous faire voir comme les

chambres sont diuisées, l'une s'appelle la grand chambre, & l'autre la chambre des communes; laquelle bien qu'elle soit ainsi appellée, est neantmoins composée pour la plus grand part, de Caualliers très-nobles, de personnes de qualité & des plus rares esprits du Royaume; & en fin vous descrire la façon dont ils vsent pour consulter, la maniere avec laquelle ils donnent leurs suffrages, & les paroles que profere le Roy pour approuuer ou desapprouuer les matieres qui s'y proposent, selon qu'elles ont esté premierement resoluës dans ces deux chambres. Je pourrois encore vous raconter quelle estime on fait de la personne du Roy, la façon dont il est serui dans sa Maison, les titres qu'on luy donne, & les prerogatiues qu'il a, ainsi que le Roy de France, de signer les Roolles & les Patentés de l'Ordre des Cheualiers de la Jarretiere, lequel a esté instué en ce Royaume, comme celuy du Saint Esprit en France, & de la Toi-

son en Flandre: Mais parce qu'il faudroit beaucoup de temps pour les considerer, & que bien que ces choses soient belles & curieuses, elles sont assez cognües pour auoir desia esté descrites par plusieurs personnes: ie les laisseray donc à part, afin d'employer le temps en des choses de plus grande importance.

Le Monarque qui possede cette très-belle & très-noble Isle, laquelle contient, comme ie vous ay desia dit, les Royaumes d'Angleterre, d'Ecosse & d'Irlande, avec toutes les Isles circonuoisines, nommées *Obades* & *Orcades*, est apresent Iacque Stuart 6. de ce Nom Roy d'Ecosse, & premier d'Angleterre, paruenue à la Couronne par la voye legitime de succession, estât descendu par ses pere & mere, d'une Fille de Henry 7. Roy d'Angleterre, laquelle fut mariée à Iacques 5. Roy d'Ecosse, dont il tire son origine. C'est par cette raison que la Maison de Henry 7. estant entièrement esteinte dans la mort de la

seüe Reyne Elisabeth, il ne se trouua personne plus proche parent & plus habile à succeder à la Couronne que luy; quoy que la Reyne pendant sa viene l'aye jamais voulu declarer successeur, non pas qu'elle ne le recognust tel, & qu'elle ne desirât, comme elle fist paroistre à la fin de sa vie, qu'il fust son heritier: Mais parce que viuant avec soupçon, ainsi que la pluspart des Princes, & prenant jalousie de ses propres enfans, elle ne voulut jamais se declarer, que lors qu'elle se vit sur le point de rendre l'ame; auquel moment elle se resolut enfin de declarer sa derniere volonté; & l'on peut dire qu'elle l'a plustôt démontrée par signes, que proferée; car estant proche de sa derniere heure, & suppliée par plusieurs fois de tous les Seigneurs de son Conseil, qui y estoient tous presens, de leur faire sçauoir quelle estoit sa derniere volonté, & à qui elle recommandoit son Royaume, elle profera ces tristes parolles: *Main-*

tenant Elderman (qui signifie en langue Angloise *personne basse & vile*) & ayant aussi-tost perdu la parole, elle fit signe de la main à vn de ses Conseillers de luy faire apporter la Couronne; après quoy on luy demanda si elle vouloit qu'on la donnât au Roy de France, elle répondit avec la teste que non; on l'interrogea si elle desiroit que le Roy d'Espagne fust son heritier, elle fist la mesme action; & ensuite ayant nommé le Roy d'Ecosse, elle fit signe que c'estoit son desir & sa volonté. Ainsi peu de temps après elle passa de cette vie avec vne tristesse vniuerselle; parce qu'il n'y a point de doute, que bien que cette Princesse aye esté d'une Religion contraire à la nostre (ce qu'elle a esté contrainte de faire plutôt par la persécution de ses Ministres, que de sa propre inclination) elle a neantmoins esté vne des plus genereuses & des plus grandes qui ayt paru au monde il y a long-temps, ayant montré en toutes ses actions

vne prudence très-merueilleuse l'espace de 42. ans qu'elle a esté sur le Thrône , & conserué son Royaume en paix , nonobstant les mauuais humeurs dont elle le trouua remply, à cause de la Religion & autres desordres : Mais elle sçeut si bien s'accommoder au temps & aux occasions, qu'elle surpassa tousiours toutes les difficultez qui se presenterent, & s'il y eut quelques troubles dans le Royaume, ils ne furent pas considérables, cette Princesse ayant toujours résisté avec vne si ferme constance & vne si grande generosité à tous ses ennemis, qu'elle les a mesme tousiours abaissés ; Elle a enfin sceu maintenir & proteger les Holandois, qui n'estoient pas si bien establys qu'à present, contre la puissance du Roy d'Espagne, cognoissant combien il estoit important & necessaire pour la seureté de son Royaume, que les Espagnols ne possedassent pas les Pays Bas : C'est ce qui l'obligea de combattre contre eux avec generosi-

té & brauoure, & de leur faire la guerre l'espace de plusieurs années. Mais parce que mon intention n'est pas d'entrer en discours des belles qualitez d'une Reyne qui n'est plus, ne le trouuant pas à propos, ie vous diray seulement pour conclusion, qu'elle a esté très-prudente dans son Gouuernement, très-diligente dans la conseruation de ses Estats, voulant assister à toutes les affaires, & en fin très-pénetrante & très-soigneuse.

Cette grande Princesse estant morte, & ayant déclaré, comme j'ay déjà dit, sa volonté plutôt par signe que par parole, le Conseil d'Etat fut incontinent assemblé : Auquel outre les Conseillers ordinaires, se trouuerent aussi plusieurs autres Seigneurs de marque, estant permis en ce Royaume à toutes les personnes de qualité d'y entrer, & de s'y gouverner comme en vne Republique. L'on y fit vn discours touchant vn successeur; mais la question ne dura pas long-temps & fut aussi-tost ter-

minée; car ayant considéré qu'il n'y auoit personne qui peust avec plus de justice paruenir à la Couronne, & ayant fait reflection sur la volonté de de la Reyne deffunte, & sur le bien qui venoit à ce Royaume, par la réunion de l'Ecosse à la Couronne d'Angleterre, ils jeterent tous les yeux sur ce Roy, & concoururent vnanimement à le proclamer pour leur legitime Seigneur, bien que la loy du Pays l'en exclût; Mais estant né dans la mesme Isle, ils ne voulurent pas le traiter en qualité d'Estranger.

Celuy donc qui regne à present est Iacques 6. Roy d'Ecosse & premier d'Angleterre, né en l'an 1563. le 19. de Iuin, & qui est maintenant âgé de 43. ans, il est d'une stature décente, d'une fort bonne complexion, d'une presence douce, & d'une nature fort robuste, laquelle il tâche de conseruer en sa vigueur; il ayme fort la chasse, & s'en sert non seulement pour son diuertissement, mais encore pour sa santé, & s'y occupe si par-

ticulierement qu'il a abandonné & mis sous le pied toutes les autres affaires, lesquelles il a remises à son conseil & à ses Ministres; en sorte que l'on peut dire avec verité, qu'il est seulement Prince de nom, & plutôt d'apparence que d'effet; ce qui procede de sa pure inclination, veu qu'il peut & sçait exercer l'art de regner, & qu'il est doué d'un très-bel Esprit, & d'une science extraordinaire, s'estant fort adonné à l'Estude pendant sa jeunesse; mais à present il l'a entierement abandonnée: Il professe la Religion protestante, que l'on appelle ainsi, parce qu'elle est à proprement parler un mélange de diuerses Religions, quant à la doctrine; mais non pas en ce qui regarde le Gouvernement & la Politique; Caluin niant non seulement les puissances spirituelles, mais encore les temporelles; ce que tous les Princes ont en horreur.

Ces peuples suivent trois sortes de Religions, sçauoir la Catholique

Romaine, la Protestante, & la Puritaine; cette dernière outre qu'elle est pernicieuse, est encore la ruine des Principautés & des Monarchies; puis qu'elle tend entièrement à la liberté & au gouvernement populaire: Et d'autant que ce nom de liberté est très-doux & agreable à vn chacun, cette Religion est facilement embrassée: d'où vient que le tiers de ces Pays & de ces Peuples sont Puritains; nonobstant que le Roy & les Ministres fassent tout leur possible & employent tout leur Art, pour la détruire: Mais parce que plusieurs de ses Contelliers mesmes ayment cette Religion, & qu'ils la fermentent pour leurs fins & leur interest, on n'y procede pas avec toute la rigueur que l'on pourroit, & ceux qui entrent dans les deliberations qui se font contre les gens de cette Secte, en observent les erreurs, & les couvrent si bien du manteau d'honnesteté, que cette Religion augmente plutôt qu'elle ne diminue.

La Protestante, qui est celle que S. M. professe, est, comme j'ay dit, conforme à la doctrine de Calvin quant aux Dogmes, mais pour le gouvernement, elle est bien différente, admettant les Eueſques & les Superieurs Ecclesiastiques, & qui plus est le gouvernement & la puissance Seculiere & Royale. Cette Religion est suiuite d'un autre tiers, & le Roy procure autant qu'il peut son auancement & son progresz, desirant très-ardemment de reduire ses peuples sous cette mesme Religion.

Le reste de cette Nation qui est vn tiers, & peut-estre plus, cōserue avec vne constance incroyable & vne exemple incomparable, la Religion Catholique; laquelle, ainsi qu'il est très-manifeste à V. S. commença à decliner & à se corrompre, pendant la vie de Henry 8. qui voulant repudier Catherine, fille de Ferdinand d'Aragon surnommé Catholique, pour l'amour extrême dont il brusloit pour Anne de Bolen, fit traiter à

Rome pour en auoir dispense, dans l'esperance de l'obtenir indubitablement : Mais Clement 7. qui estoit alors dans le Pontificat, cognoissant que ce seroit vne chose très-scandaleuse & très-injuste, & s'estant laissé persuader par les Officiers de Charles Quint, Neveu de ladite Catherine, ou par quelqu'autre mouuement, il en refusa tout à plat le Roy, qui creut que ce refus luy auoit esté fait, non par justice, mais par interest : Et ce qui fâcha plus le Roy, ce fut qu'il creut qu'on s'estoit moqué de luy, veu que les promesses qu'on luy auoit faites, & l'assurance qu'il auoit eüe de la bonne intention du Pape en ce rencontre, l'obligeoit à tenir pour certain que le Pape ne luy refuseroit point cette dispense, & ne pouuoit pas croire que Sa Sainteté fût capable de manquer à sa parole. Estant donc animé & plein de déplaisir & de rage, il foula l'autorité du Pape aux pieds, il répudia sa femme, & épousa Anne de Bolen, & ayât soustrait les Royau-

yaumes & ses Domaines de l'obeïssance du saint Siege, il conceut vn tel dédain contre le Pape, qu'afin d'ôter tout moyen de retourner sous l'obeïssance du saint Siege, il trouua expedient d'interessier tous les plus grands Seigneurs de son Royaume, en donnant, vendant & changeant à vne infinité de tous ces Seigneurs presque tous les biens d'Eglise, permettant mesme de piller les Eglises & les Monasteres; lesquels estoient si riches & si opulens, qu'on m'a assuré que la moitié des biens de ce Royaume estoient possédez par les Ecclesiastiques: en sorte que si le Parlement sous le regne d'Edouïard, n'eust par vne Loy semblable à celle que V. S. a depuis peu faite, arrêté le cours de ces richesses, & qu'il eust esté permis aux Ecclesiastiques d'acheter & d'heriter les biens, il est certain que les Layques n'auroient pas apresent de quoy viure. Le Roy s'imagina d'oc d'interessier par ce moyen vne infinité de personnes considerables, les

quelles, au mesme instant qu'on auroit proposé de retourner sous l'obéissance du Pape, se seroient vertement opposez, afin de n'estre pas obligez de rendre les biens qu'ils possédoient; d'autant qu'vnchacun sçait que les biens Ecclesiastiques ne se peuvent aliener: C'est pour cette raison, que le Roy se persuada que les Papes ne s'accorderoient jamais que par la restitution des biens d'Eglise; & qu'au contraire la crainte que ceux qui les possédoient, auroient de les perdre, les obligeroit à ne consentir jamais de retourner sous son obéissance, & comme en effet il est arriué. Et il ny a point de doute que si les Papes au commencement auoient consenty de perdre vn peu du temporel, pour acquerir du spirituel, les affaires seroient en vn autre estat.

Le Roy asséura donc son dessein par ce moyen, cognoissant que les Ecclesiastiques heritent très-volontiers les choses de ce monde, & que bien plus ils en font tout-a-fait au-

des, comme ils le donnent trop à connoître par leur continuelle ambition. Ce mal fait que les affaires de la Religion, tant en Angleterre qu'autres lieux, vont plutôt diminuant qu'augmentant, & cela d'autant plus que depuis vn temps en ça, comme on dit en ce Pays, les choses de la Religion sont traittées avec des maximes bien differentes de celles de Nostre Seigneur Iesus-Christ & de l'Eglise primitive, qui n'agissoit qu'avec l'instruction, la predication, la bonne vie, le bon exemple, la douceur & la charité: Mais maintenant, bien que la doctrine & les predications soient tousjours les mesmes, chacun sçait neantmoins que la vie & l'exemple est tout autre. Outre cela l'on introduit vne nouvelle doctrine, ou plutôt vne très-pernicieuse maxime, dont on ne cognoist point le fondement, qui est de violenter les Princes & les peuples par la servitude & la rigueur, & qui pis est, de proceder avec le fer & le poison; Ce

qui produit vn effet tout contraire à celuy que l'on desire, veu que les esprits des bien-intentionnez, qui n'ont point n'autre but que le seruice de Dieu, en sont tout-a-fait scandalisez; & que ceux contre qui on vse de ces rigueurs, s'opiniâtrent & se retirent de ceux mesme qui ont de bonnes inclinations. Le Roy auoit declaré l'autorité du Pape nulle, & despoüillé les Eglises de leurs biens, les donnans & les consommans, comme j'ay dit cy-dessus; & pourtant faisoit continuer l'Office diuin & la sainte Messe à l'ordinaire: Mais les chefs des Religions Lutherienne & Calviniste, voyant qu'il se presentoit vne si belle occasion de semer leur doctrine, ne s'endormirent pas, pour executer ce dont ils s'estoient persuadez de venir à bout. Henry estant donc venu à mourir, & Edouard luy ayant succédé encore jeune, & incapable de gouverner ses Ministres, desja infectez de cette maudite heresie, on banit tout-a-fait.

la Messe, & on renuersa de fond en comble le Christianisme Apostolique: Et Edouard estant mort, après auoir regné seulement 6. ou 7. ans, la Reyne Marie sa Sœur qui luy succeda, fit tout son possible pour y restablir la Foy Catholique: mais ces semences d'heresies ayant desja pris de très-profondes racines, il s'y trouua des difficultez inuincibles: Car bien que la Religion Catholique s'observât dans tout le Roy aume, & que tous les peuples s'y conformassent, c'estoit toutes-fois plus par la crainte des Loix, qui estoient extrêmement rigoureuses contre les Heretiques, que par vn bon & veritable sentiment, qui est l'vnique baze de la Religion. Ainsi la Reyne n'ayant pas vescu long-temps, elle ne put faire le progrez que peut-estre elle auroit fait, si elle eust regné davantage. Elisabeth luy succeda, & à son euenement à la Couronne, elle fut fort combatuë de ses Ministres, qui estant interessez dans les biens

Ecclesiastiques, employerent tout l'artifice imaginable pour gagner l'esprit & la volonté de cette Majesté, qu'ils persuaderent principalement par vne raison, qui est que Sa Majesté estant née d'Anne de Bolen, dont le Mariage n'auoit point esté approuué par le Pape, il estoit indubitable que si elle se soumettoit à son autorité, il la declareroit batarde, & inhabile à la succession du Royaume: Et que quand bien le Pape, pour r'establir la Religion Catholique en ce Royaume luy auroit promis beaucoup de choses; toutes-fois elle deuoit tenir pour certain, qu'à la moindre occasion, le mesme Pape ou du moins ses Successeurs ne manqueroient pas de releuer cette question, qui seroit capable d'enfanter mille mauuais effets, s'attribuant l'autorité de pouuoir faire & deffaire toutes les choses de ce monde icy & de l'autre: Ainsi, qu'il luy seroit bien plus assésuré & plus court d'affermir le Calvinisme, & se declarer chef

de cette Eglise, afin que par ce moyen le Mariage de sa Mere restant approuvé & confirmé, elle peust d'autant mieux s'establir dans la succession & dans la possession de ce Royaume.

Pour ces raisons & pour plusieurs autres semblables, la Reyne resolut de faire vn Edit contre la Religion Catholique, que Marie la Sœur auoit introduite; & ordonna que l'on professeroit de là en auant la Calviniste.

Ce changement mit fort en colere le Pape Pie V. lequel pousé par la persuasion de plusieurs personnes qui desiroient mettre le feu dans ce Royaume, plustost pour leur interest & pour des raisons mondaines, que pour l'amour de la Religion, bien qu'ils se couvrissent de ce manteau, afin de faire passer pour honnestes leurs trop importunes instances, delibera d'excommunier cette Reyne, peu d'années après son aduenement à la Couronne. Il faut icy remarquer qu'encore que l'exercice de la Reli-

gion Catholique fust deffendu, chacun neantmoins ne laissoit pas de viure en sa maison selon son libre arbitre, sans qu'on en fist aucune inquisition; en sorte que depuis la deffence mesme d'exercer la Religion Catholique, on a peu neantmoins dire que la liberté de conscience y a esté jusques à ce temps. Mais maintenant les affaires se trouuent en bien pire estat; Parce que, comme j'ay dit, ceux qui vouloient allumer le feu dans ce Royaume, voyant que l'excommunication n'auoit pas eu tout l'effet qu'ils s'estoient promis (sçauoir de faire rebeller le peuple, & l'obliger à prendre les armes contre la Reyne) mediterent vn autre moyen pour venir à bout de leur dessein. C'est pourquoy ils representerent au Pape par mille beaux raisonnemens, & tousjours sous couleur de Religion, qu'il pouoit bien maintenir & ayder la Religion Catholique en ce Royaume, s'il faisoit vne Mission de Iesuites en ce Pays, lesquels estant gens de cœur,

de vertu & de science, pourroient indubitablement faire de grands progres dans la vigne du Seigneur. Sa Sainteté trouua cét auis si à propos & si utile, qu'elle se resolut aussi-tost de le mettre à execution; Et pour cét effet, elle commanda à plusieurs Iesuites Anglois de Nation (à cause que sans la Langue, qui est assez difficile, il auroit esté impossible de réussir) de se trauestir en Seculiers & de passer en Angleterre pour donner assistance spirituelle à ces peuples, pour les instruire & les conuertir à la Foy Catholique. Ces Peres obeyrent incontinent, & estant abordez en ce Royaume, commencerent à semer la doctrine que cette mesme Compagnie professe dans Rome, & public par ses escrits; qui est, que les peuples Sujets d'un Prince heretique ne sont pas obligez au serment de fidelité, & que par consequent ils peuvent se souleuer, faire des seditions, conspirer contre luy, attenter à sa vie & autres choses semblables.

Cette doctrine commença à donner de si fortes impressions dans l'âme de ces peuples , & fut embrassée avec tant d'ardeur , par ceux qui aimoient la nouveauté & les changemens, que de là en avant , on découvroit sans cesse des conspirations contre la vie de la Reyne , avec danger de la ruine totale de l'Estat : ce qui obligea la Reyne & tous les Seigneurs du Gouvernement, de penser serieusement à pourvoir à ses desordres , estimant que celà ne pouenoit pas des Catholiques , mais des Prestres & des Iesuites-particulièrement , qui auoient semé & prêché la susdite doctrine. Celà les obligea donc de faire des Loix très-rigoureuses & en quantité, lesquelles ie passeray icy sous silence, crainte de vous estre ennuyeux; seulement ie vous parleray d'une qui porte qu'un Catholique refusant d'aller à leurs Eglises & Predications , est obligé de payer par mois 80. écus, s'il a le moyen; s'il ne peut pas tant payer, il perd les deux tiers de ses biens;

en sorte qu'une personne qui auroit 600. écus de reuenu en perd 400. Si c'est vn artisan, les Sergens vont tous les Mois chez-luy, & emportent jusques à son lit; & en cas qu'il soit conuaincu d'auoir entendu la Messe, d'auoir receu vn Prestre ou vn Iésuite en sa maison, ou mesme de luy auoir parlé, il est pris pour criminel de Lèze Majesté, & sans autre forme de procès, on luy oste la vie & le bien. De plus tout Catholique est décheu de la protectiõ de la Loy, si bien qu'il ne peut auoir action contre ses débiteurs, la Iustice ne voulant point prendre sa cause en main; si vn Catholique est maltraité de parolles & de coups, il n'a aucun recours à la Iustice; de sorte que la miserable condition des Catholiques de ce Pays est fort à pleindre, le Roy & son Conseil pretendunt par ce moyen d'éteindre entierement la Religion Catholique: Mais la diuine Prouidence, qui est par dessus tous les Roys & tous les Conseils du monde, donne tant de force & de

& de vigueur à plusieurs, que notwithstanding les rigueurs espouventables des Loix & des peines, ils nous donnent vn exemple incomparable de leur constance, & résistent fermes comme des rochers, à toutes ces tempestes & bourasques, supportans avec joye & fermeté les calamitez, les miseres & les persecutions.

L'on doit pourtant confesser que cette doctrine, semée par les Iesuites a beaucoup prejudicié à la Religion; puis qu'il se void vne infinité de personnes, qui manquans de cette haute vertu & de cette grande constance, sont intimidez par les Loix, & vivent tout autrement que leur conscience ne leur dicte: Que si l'on vient à remonter au Roy & à ses Ministres, que l'on ne deuroit pas vser d'une si grande cruauté & persecution enuers les Catholiques, ils répondent que l'on ne peut pas moins faire, veu que tous les Catholiques qui sont dans le Royaume, sont autant d'Ennemys: Et pour cette rai-

son, les affaires empirent de jour en jour, & deuiendront encore plus mauuaises à l'aduenir, à cause de la Loy que le Parlement a depuis peu fait publier, par laquelle il n'est pas mesme permis aux Catholiques d'éleuer & instruire leurs enfans, mais elle les oblige de les donner à instruire & à esleuer à leurs parens ou amis de Religion contraire. C'est pourquoy il est constant que si Dieu ne prend sa propre cause en main, & qu'il n'ouure le chemin à quelque bien, la Religion Catholique s'éteindra entierement avec le temps, & l'on ne luy donne autre titre que celuy de doctrine inuentée, & soutenüe par les Iesuites.

J'ay voulu représenter à V. S. toutes les choses susdites, non seulement pour luy faire voir l'origine & le progres de cette nouvelle Religion introduite en ce Royaume, mais aussi l'estat où elle se trouue à present; & celà d'autant plus volontiers qu'il s'y agit de la Religion,

qui concerne & l'intérêt de l'âme, & le gouvernement de l'Estat, puisque sans elle il est impossible de bien regir les peuples.

Or Serenissime Prince, le Roy qui regne à présent en Angleterre est de la Religion Protestante, & grand ennemy de la nostre, non seulement parce qu'il la croit pleine d'abus & d'artifice; mais particulièrement pour cette injuste, impie, & inhumaine doctrine, dont nous auons cy-deuant discouru: ce qu'il l'oblige d'en parler fort mal, & en des termes fort méprisans & tout-à-fait injurieux; & il l'a d'autant plus en horreur, que dans cette dernière conjuration contre sa personne & contre tout son Royaume, il découurit le plus horrible, le plus cruel & le plus barbare attentat qui ayt jamais esté fait: car, comme il m'a dit luy-mesme, on a veu plusieurs fois assassiner des Princes, on a veu entreprendre d'esteindre vne maison & des posteritez entiere; mais de vouloir estein-

dre avec la personne du Roy, toute sa posterité, & ruiner vn Royaume entier, cela n'a point d'exemple; car si cette entreprise eust réüssi il est certain, que non seulement le Roy, la Reyne & leurs Enfans, seroient demeurez sur le carreau; mais encore tout le Clergé, les Iuges, la pluspart des bourgeois, & plus de trente mille personnes y seroient perys; & en après le peuple sans Chef auroit eu liberté de faire tout le mal qu'il auroit voulu, à la ruine totale du Royaume; Et qui plus est, il pretend que les Iesuites ont esté participans de cette trahison épouuentable. C'est sans doute ce qui rendra ce Prince plus cruel enuers nostre veritable Religlon; car au reste S. M. est vn Monarque fort doux de son naturel, ennemy de la cruauté, amateur de la Iustice, & plein de bonne volonté. Il a coustume d'aller à la Priere & au Presche tous les Dimanches & tous les Mardys, ayant ce jour fort en deuotion, auquel il fut deliuré d'une

conjuración, que certains Contes Escossois auoient faite pour le tuer en l'an 1660. en Ecoſſe: C'est pourquoy il va tous les Mardys à l'Eglise, pour rendre graces à Dieu, qui le preſerua de ces aſſaſins. Il ayme la tranquillité, la paix, & le repos; il n'a aucune inclination pour la guerre: au contraire, elle n'eſt point du tout conforme à ſon naturel, c'eſt ce qui déplaist à pluſieurs de ſes Sujets. Et ce qu'ils trouuent encore plus mauuais, eſt que le Roy ayant abandonné entièrement le gouuernement de ſes Royaumes, il en laiſſe tout le ſoin à ſon Conſeil, & ne penſe à rien autre choſe qu'à prendre ſon diuertiffement à la chaſſe. Il ne fait point de careſſes à ſes Sujets, & ne les accueille pas avec les bonnes-cheres, dont la Reyne Eliſabeth uſa pour gagner le cœur de ce peuple; lequel ayme tant ſon Prince que ſ'il paſſoit cent fois le jour par vne rue, ils courroient tousjours pour le voir, eſtant bien aiſe que S. M. trouue bon cet é-

moignage d'affection. La Reyne Elisabeth obseruoit très-bien cette coutume, mais le Roy au contraire la méprise & la dédaigne. Ainsi comme la Reyne acquit grandement l'amour des peuples, le Roy d'apresent en est hay & méprisé, S. M. estant plustost d'humeur à viure en particulier parmy 8. ou 10. des siens, que magnifiquement & en public, comme c'est la coustume du Pays & le desir des peuples.

La Reyne nommée Anne, Sœur du Roy de Dannemark, est vne Princesse très-affable, & d'une humeur enjouée, belle mediocrement & encore plus gracieuse, elle a esté esleuée dans la Religion Lutherienne, que l'on professe en Dannemark: Le Roy estant en Ecosse, fit son possible pour l'obliger à embrasser sa Religion, & plusieurs autres personnes luy parlerent de la Catholique, à laquelle elle a tousjours montré & montre encore vne particuliere inclination, d'où le bruit est qu'elle est

Catholique; & en effet ie suis certain que si elle estoit en liberté, elle se declareroit pour nostre Religion; mais cognoissant la volonté du Roy toute contraire, & qu'elle seroit obligée de viure continuellement dans la sollicitude & dans le danger, elle s'est accommodée au temps & à la nécessité: de sorte qu'elle ne s'attache qu'à se divertir, & ayme fort la dance & les festins. Cette Princesse est très-prudente & a l'esprit fort bon; elle cognoist parfaitement tous les desordres de l'Estat, mais elle n'y participe point, quoy que plusieurs s'imaginent qu'estant aymée infiniment du Roy, elle y doit auoir la meilleure part; mais comme cette Princesse n'est pas robuste ny d'un naturel propre au trauail, mais qu'elle est jeune, & qu'elle void que ceux qui gouernent, sont grandement interessez, & veulent estre seuls; elle témoigne de ne s'en point soucier; d'où vient qu'elle ne se mesle de rien, si ce n'est de demander grace pour

quelqu'un: ce qui fait que le peuple l'ayme, la cherit & la respecte. Elle est remplie de douceur & d'humanité, pour ceux qui sçauent seconder son humeur, mais d'autre costé elle est terrible, superbe & intolérable, avec ceux qu'elle n'ayme pas. Elle a trois Sœurs, dont l'une est mariée au Duc de Saxe, l'autre au Duc de Brunsvik, & la 3. à celui d'Holface, & par ce moyen le Roy s'est alié & apparenté avec la pluspart des Princes d'Allemagne.

De ce Mariage S. M. a eu 4. enfans, 2. Fils & 2. Filles; l'Aîné nommé Henry, est vn Prince fort spirituel, très-generoux & d'une très-grande esperance, toutes ses actions sont accompagnées d'une grauité surprenante, & au dessus de son âge, il s'adonne à l'Estude, mais il ne s'y plaist pas; & il le fait plustost pour complaire à son Pere que par sa propre inclination, dont S.M. le reprend fort souuent; & vn jour entr'autres, après luy auoir fait vne longue remontran-

ce sur ce sujet, il luy dit, que s'il ne vouloit s'appliquer plus serieusement à l'estude, il donneroit le Royaume à son Frere nommé Charles, parce qu'il aprenoit parfaitement bien, & qu'il estudioit avec esprit & attention. Le Prince ne répondit rien par respect à son Pere; mais entrant en sa chambre, & son Precepteur continuant de luy dire plusieurs choses à ce propos, il luy repartit: ie sçay ce qui conuient à vn grand Prince, & il n'est pas necessaire que ie sois Docteur, mais plustost Soldat, & bien cognoissant dans les choses du monde: Si mon Frere est si docté qu'on se le persuade, il le faut faire Euesque de Cantorbrie. Cette réponce ayant esté rapportée au Roy son Pere, elle ne luy pleut pas trop; car comme S. M. se persuadoit qu'il estoit beaucoup aymé, qu'il donnoit de belles augures de sa personne, & que ses Sujets auoient desja mist toutes leurs esperances en luy, elle commença d'en faire paroistre de la jalou-

tie; & pour cette raison, ce jeune Prince a besoin d'auoir auprez de soy vne personne de jugement & de Conseil.

L'aînée de ses Filles, âgée de 9. Ans se nomme Elisabeth, & l'autre naquit seulement l'An passé, au mois de May, & fut appelée Marie, du nom de la Mere de S. M. La personne la plus proche de Sang de S. M. après ses Enfans, est Madame Isabelle, laquelle descend, ainsi que le Roy, de Marguerite Fille de Henry 7. estant née d'un Frere naturel du Pere de S. M. par où elle luy est Cousine. Elle est âgée de 28. Ans; elle n'est pas bien belle, mais en recompense elle est ornée de mille belles vertus, car outre qu'elle est noble & dans ses actions & dans ses mœurs, elle possède plusieurs Langues en perfection, sçauoir, le Latin, l'Italien, le François & l'Espagnol, elle entend le Grec & l'Hebreu, & estude sans cesse: Elle n'est pas beaucoup riche, car la Reyne deffunte prenant jalousie

de tout le monde, & principalement de ceux qui auoient quelque preten-
 tion à la Couronne, luy osta sous di-
 uers pretextes, la plus grand part de
 ses reuenus; c'est pourquoy la pau-
 ure Dame ne peut pas viure dans la
 splendeur, & n'a pas le moyen de
 faire du bien à ceux qui la seruent,
 comme elle voudroit. Le Roy témoi-
 gne auoir de l'affection & de l'estime
 pour elle, la laissant viure en Cour,
 ce que la Reyne deffunte ne luy vou-
 lut jamais permettre. Le Roy luy a-
 uoit promis de luy rendre ses biens &
 de luy donner vn Mary, elle est
 neantmoins encôre priuée & de l'vn
 & de l'autre.

I'ay dit cy-deuant, Prince Sere-
 nissime, que S. M. auoit vne très-
 grande passion pour la chasse, &
 qu'elle estoit d'vne humeur à se met-
 tre fort peu en peine des affaires de
 l'Estat, pour le soin, le soucy & le
 trauail qu'elles apportent avec elles,
 & qu'elle s'en reposoit entierement
 sur son Conseil: C'est pourquoy ie

ttouue à propos de vous entreténir vn peu de ses Conseillers, qui sont apresent 25. le nombre n'en estant point certain ny determiné: mais dependant de la pure volonté du Roy, qui les peut augmenter & diminuer, oster & changer comme il letrouue à propos pour son seruice, & a mesme la liberté d'y faire entrer les Estrangers; ce qu'il ne fait pourtant pas. Parmy ces Messieurs les Conseillers, il y en a 4. Ecoffois, & les autres sont Anglois, tous des premiers & des plus grands Seigneurs d'Angleterre, ou par Noblesse, ou par ancienneté, ou du moins par le credit & la faueur du Roy, & portent presque tous la qualité de Comte, qui est vne chose fort releuée en ce Royaume, ayant la Couronne dans leurs Armes, & se faisant seruir à genoux, bien que leur domaine en qualité de Comte ne soit rien, puis qu'ils n'ont pas le pouuoir ny de juger vn Sujet, ny de le mettre en prison, ny mesme de le chastier: mais tout

celà n'est que fumée & vanité, dont les Nations Espagnole & Angloise sont si enflées, qu'il n'y en a point qui surpassent cette dernière, & fort peu qui l'égalent. Ces Conseillers suivent ordinairement la personne du Roy, quand il ne marche pas pour ses diuertissemens particuliers : Car alors ils s'arrestent à la Cour : ce qui arrive fort souvent dans Londres. Leur Authorité est si grande, qu'elle excède la raison; ce n'est pas neantmoins qu'on la leur aye octroyée ainsi, mais ils l'vsurpent tellement peu à peu, qu'elle ne peut pas estre plus grande qu'elle se trouue aujourd'huy, par la benignité & la facilité du Roy : Et bien qu'ils soient souvent desunis & diuisez en beaucoup de choses, ils sont neantmoins tousjours d'accord, quand il s'agit de la conservation de leur credit & de leur authorité, qui leur sert pour maintenir non seulement leur reputation, mais encore pour acquerir des richesses immenses : Car dans ce Conseil

on y traite des affaires d'Etat & des particulieres, & principalement des finances, impôts, gabelles, punitions & graces, bref de toutes les choses du Royaume; en sorte que personne ne peut s'exempter de recognoître cette justice. D'où vient que tous les particuliers sont obligez de chercher la grace & la protection de quelqu'un de ces Seigneurs, ce qui ne se peut faire sans grands presens, qui sont si ordinaires en ce Pays, que qui plus en reçoit, plus est estimé & honoré; & cet abus est à un tel point qu'ils prennent non seulement de leurs Sujets, mais mesme des Estrangers & Ministres de Princes. J'ay dit que l'autorité de ces Seigneurs est fort grande, & que ce sont autant de Princes; si bien que tant-plus le credit de ceux cy est grand, moins on tient de compte de tous les autres, & cela fait naître un mécontentement uniuersel; parce que plusieurs personnes de condition, & de famille très-noble & très-ancienne, venant

par ce moyen à estre méprisez, haïssent tellement la puissance de ces Conseillers, qu'ils osent dire hautement que ce sont autant de petits Roys & de tyrans; comme en effet il leur est permis de faire le juste & l'injuste selon qu'il leur plaist, sans aucun égard.

Auant que de vous parler des intelligences que S. M. a avec les autres Princes, dont le discours sera la dernière partie de cette petite Relation; ie vous feray remarquer quelques particularitez touchant l'esprit & les sentimens du Roy, quoy que cette matiere soit fort delicate, les hommes se pouuans très-facilement tromper dans des choses si secretes & si variables, qu'elles changent d'ordinaire selon l'occasion & les accidents; le crois neantmoins, qu'ayant eu diuers entretiens familiers avec le Comte de Galcon, & avec la personne du Roy mesme, ie puis asseurer avec fondement & certitude que S. M. est entièrement portée à la Paix, au repos &

audieusement. Il m'a dit plusieurs fois qu'il ne vouloit point de guerre, si on ne luy en donnoit grand iuger, & que quoy qu'il eust plusieurs pretentions, particulièrement contre la France, dont il porte encore le tiltre, & aussi contre l'Espagne pour le Duché de Cleues, ces raisons ne seroient jamais capables de luy mettre les armes en main, estant dans l'oppinion qu'on ne deuoit pas faire la guerre sans necessité, pour des vieilles & anciennes pretentions; & que lorsqu'elles passioient 50. ans, vn Prince faisoit mal de s'y arrester: parce que si les Roys vouloient rechercher les Prouinces & les Estats, qui ont esté possedez par leurs Ancestres depuis 200. ou 300. ans en ça, & qu'en consequence ils eussent le dessein de les reprendre par la force & par les armes, il est certain qu'ils n'en pourroient jamais venir à bout, & que l'Empereur plus que tout autre, comme legitime successeur des Empereurs, qui ont possédé la moitié de

l'Vniuers, auroit à viure dans vne continüelle guerre, pour recouurer & réunir à l'Empire, les Estats & les Terres qui se trouuent aujour-d'huy possédées par tant de Princes. D'où nous pouuons juger avec assez de certitude que les pensées du Roy sont entierement portées à la Paix & au repos; veu mesme que luy & tous les Anglois croyent, qu'il n'y a pour le present aucun Prince dans l'Europe, dont le Thrône soit plus stable & mieux affermy, que celuy de la grande Bretagne, qui d'autre costé se trouue plus fort que jamais, par l'vnion des Royaumes d'Angleterre & d'Ecosse: Ce qui leur fait imaginer que leur Estat est vn monde à part, & si bien separé de l'autre, qu'ils n'ont pas besoin de rien craindre.

DES INTELLIGENCES.

CE Monarque ne fait pas grand estime du Pape, le considerant comme Prince temporel & spirituel;

comme temporel il ne le considère point du tout, parce qu'en étant esloigné il ne luy peut faire ny bien ny mal, & que d'autre costé, comme dit S. M., c'est vn Estat fort sujet à l'inconstance, par le changement continuel des Princes qui le gouvernent, étant constant qu'un Pape qui auroit commencé quelque chose de bon & de considérable, ne pourroit pas en voir la fin, pour le peu de durée de sa vie, & qu'un autre venant à luy succeder, ruineroit aussi-tost ou abandonneroit son entreprise : outre qu'ordinairement les Papes n'ont point de plus fortes pensées que d'enrichir & aduancer ceux de leur Sang, & que par consequent il faut qu'ils dépendent des Princes qui leur peuvent faire meilleur party, & donner le plus à leurs parens. En après, considérant le Pape comme Prince spirituel, il le hait & l'a tout-à-fait en horreur, l'appellant Monstre de Nature ; mais il ne faut pas s'en estonner, en ce qu'il est de contraire Religion, & que par

consequent il ne doit ny ne peut louer le Chef de celle-là. Il assure de plus qu'il n'y a point de Prince ny de Cour dans le monde, où les vices & la corruption regnent plus ordinairement que dans Rome; & lors qu'il vient à s'estendre sur cette matiere, il en dit des choses horribles, & qui à dire le vray, offensent l'oreille de ceux qui les entendent.

Avec l'Empereur, S. M. n'entretient pas grande confiance, mais au contraire il en a de la desiance, faisant grand cas de l'Empereur & de ses forces, tant pour sa Noblesse & ancienneté, que parce qu'il croit qu'un Empereur d'esprit a une grande puissance, & peut facilement unir la plus-part des Princes d'Allemagne & des Estats libres, & par ce moyen faire de grandes & nobles entreprises: mais comme il n'a pas bonne opinion de l'Empereur d'apresent, & qu'il ne le croit pas Prince d'esprit, il n'en fait pas grand estime, & le publie assez hautement, l'ayant mesme

dit à vn Gentil-Homme de sa Majesté Imperiale, qui a esté plusieurs mois en Angleterre.

Il n'est pas non plus trop content de l'Empereur, en ce que depuis quelque temps il luy a refusé grace pour vn Gentil-Homme Allemand, bany pour vn sujet assez leger, laquelle S. M. luy auoit enuoyé demander avec instance, par vn Gentil-Homme exprés.

Quant à la France, il semble que plusieurs raisons obligent S. M. de n'estre pas en trop bonne intelligence avec le Roy Très-Chrestien : la premiere est que naturellement les Anglois & les François sont ennemys irreconciliables, comme il arriue souvent entre les voisins. La seconde que le Roy d'Angleterre a des pretentions sur la France; & quoy qu'il témoigne de n'en tenir pas grand compte, si est-ce que cela contribue à tenir leurs Esprits mal vnis. Le Roy nonobstant, ayme plus les François qu'il ne les hayt, parce qu'il est né &

effeué en Ecosse, laquelle a tousiours eu vne estroite aliance avec la Couronne de France, où les Ecossois sont fort bien venus, & autant priuilegiez que les François naturels; S. M. T. C. ayant tousiours auprès de sa Personne vne garde Ecossoise. Je ne veux pas laisser passer vne chose remarquable, qui m'a esté dite par vn Ecossois de consideration, que si le Roy d'Angleterre venoit à auoir guerre contre la France, il ne pourroit pas attendre aucun bon seruice des Ecossois, tant pour l'estroite aliance qu'ils ont avec la France, que pour l'vtilité qu'ils en retirent.

Avec le Roy de Pologne & le Moscuite, S. M. entretient assez bonne correspondance pour deux raisons: la premiere, parce que leurs Estats sont assez esloignez & qu'ils n'ont point de pretention les vns sur les autres; la seconde, parce que la compagnie de Marchands Anglois, dont ie vous ay cy-deuant parlé, negocie en ces quartiers-là, avec satisfaction des vns & des autres.

Le Roy de Dannemark estant Frere de la Reyne d'Angleterre, il n'y a point de doute que cés deux Princes sont très-bien ensemble & vivent en bonne intelligence: car outre ce motif d'amitié, le Roy de Dannemark professe la Religion Lutherienne, laquelle bien que dissemblable à celle d'Angleterre, luy plaist pour tant, parce qu'elle est contraire à la Catholique. Il y a neant-moins eu quelques differens entre cés deux Couronnes, à raison des pretentions que le Roy de Dannemark a sur les Isles Orcades, appartenantes au Royaume d'Ecosse; Et l'Ambassadeur de ce Prince, qui fut dernièrement en Angleterre, en ayant tenu quelque propos à S. M. son discours ne luy fut pas trop agreable. Neantmoins il n'y a pas d'apparence que le Roy de Dannemark presse beaucoup là dessus, parce qu'il n'y réussiroit pas & perdrait l'amitié de cette Couronne: laquelle, pour beaucoup de considerations, luy seroit fort préjudiciable.

Le Roy parle du Grand Turc avec grand despect, & témoigne de le hayr grandement, & de desirer avec passion que les Princes Chrestiens s'unissent ensemble, pour tâcher de le ruiner, estimant ce dessein très-glorieux & très-vtile pour le bien de la Chrestienté. Et pour cette raison il blâme fort les Princes Chrestiens, qui se ruinent à faire la guerre entr'eux, soit pour la Religion, soit pour l'interest; & se plaint que cette desunion rend puissant l'Ennemy de la Chrestienté. Il a tellement cette pensée imprimée dans l'âme, qu'il en parle souvent avec action; & proteste qu'il voudroit de bon cœur estre le premier en cette expedition, si les autres y vouloient contribuer & tenir son party.

Je n'ay pas beaucoup à dire des Archiducs, parce qu'ils sont avec l'Angleterre en mesme consideration que les Espagnols, & qu'ils en dépendent entierement.

Et pour le Duc de Sauoye, ils n'ont pas grand demeslé ensemble, tant

parce que les Estats de cés Princes sont esloignez, que parce qu'ils n'ont aucun interest ensemble: ainsi ils n'ont sujet ny de hayne ny d'amitié. Pour cette raison, ie passeray au grand Duc de Toscane.

Sa Majesté ayme fort cète Altesse, luy estant parent par la voye de sa femme, qui est de la Maison de Lorene, dont le Roy descend en quelque façon; parce que sa grande Mere estoit de la Maison de Guise. Ce grand Duc ne laisse passer aucune occasion sans donner des marques à S. M. de sa sincere affection, & de son respect; & il ne se passe point d'année qu'il ne luy enuoye quelque present de gentillesse, faisant tout son possible pour gagner ses bonnes graces.

Pour les Princes d'Italie, l'esloignement de leurs Estats, & le peu d'interest qu'ils ont avec cette Majesté, fait qu'ils n'en sont pas presque cognus.

Quant à nostre Serenissime Republique, le Roy m'a tesmoigné vne
affection

affection toute particuliere pour elle, & louë fort souuent la sage conduite de son Gouvernement, & de son Senat; Elle desire de la gratifier en toutes les occurrances possibles: & dans toutes les affaires qui se sont traittées avec Sa Majesté, elle a donné toute la satisfaction qu'on pouuoit attendre d'un Prince sincere & d'un veritable Amy: ce qui suffit.

Me voicy paruenü à la fin de ma Relation, & dans vn lieu où tous les Ambassadeurs ont coûtume d'adjoûter quelque chose touchant leur personne, mais ie ne les suiuray pas en ce rencontre; le vous diray seulement qu'à mon depart de Londres, il pleut à S. M. de m'enuoyer faire present de ces vaisselles d'argent que V. A. S. voit à ses pieds; & ie les acceptay, de mesme que ie les rends maintenant à V. S. Quelque temps après, la Reyne m'enuoya son Portrait, & celuy du Duc de Graek son jeune Fils, enchaîsé dans ce Ioyau qui est aussi aux pieds de V. A. S. Que s'il plaist à V.

98 RELATION D'ANGLETERRE.
A. S. & à vos Illustrissimes Seigneu-
ries, de vouloir, par leur magni-
fice & leur liberalité ordinaire, me
relâcher ces presens ainsi que ie les en
supplie très-humblement, ie les re-
ceuray pour assurance que mon
Ambassade ne leur a pas dépleu, &
pour gage de leur estime, ce qui me
donnera vne très-grande consolation.

FIN.

ANT 1317687